

《瑜伽 95》

東晉罽賓三藏瞿曇僧伽提婆譯

# 如理

《增壹阿含經卷第三十四》〈七日品第四十之一〉

[0740a25] 聞如是。

[0740a25] 一時。佛在舍衛國祇樹給孤獨園。

[0740a26] 爾時。世尊告諸比丘。我當說極妙之法。初·中·竟善。義理深邃。具足得修梵行。此經名為淨諸漏法。汝等善思念之。

[0740a28] [12]比丘對曰。如是。世尊。是時。諸比丘從佛受教。

[0740a29] 世尊告曰。彼云何名為淨諸漏法？或有有漏緣見得斷、或有有漏親近得斷。或有有漏遠離得斷。或有有漏娛樂得斷。或有有漏威儀得斷。或有有漏思惟得斷。

[0740b04] 彼云何有漏由見得斷？於是。凡夫之人不覩聖人。不順從如來之法。不能擁護賢聖之法。不親近善知識。不與善知識從事。其聞法所應思惟法者亦不分別。不應思惟者而思惟之。未生欲漏而生。已生欲漏便增多。未生有漏而生。已生有漏便增多。未生無明漏而生。已生無明漏便增多。此法不應思惟而思惟之。

[0740b12] 彼云何法應思惟，然不思惟此法？所言思惟法者。未生欲漏使不生。已生欲漏而滅之。未生有漏令不生。已生有漏而滅之。未生無明漏令不生。已生無明漏而滅之。是謂此法應可思惟而不思惟。所不應思惟者便思惟之。應思惟者復不思惟之。未生欲漏而生。已生欲漏而增多。未生有漏而生。已生有漏而增多。未生無明漏而生。已生無明漏而增多。

彼人作如是思惟。云何有過去久遠？我今當有過去久遠。或復思惟。無過去久遠，云何當有過去久遠？為誰有過去久遠？云何復有當來久遠？我今當有將來久遠。

或復言。無將來久遠。云何當有將來久遠？為誰有將來久遠？云何有此眾生久遠？此眾生久遠為從何來？從此命終當生何處？彼人起此不祥之念，便興六見。展轉生耶想。有我見審有此見。無有我見審興此見。有我見無我見於中起審見。

又復自觀身，復興此見。於己而不見己。復興此見。於無我而不見無我。於中

起此見。爾時。彼人復生此邪見。我者即是今世。亦是後世。常存於世而不朽敗。亦不變易。復不移動。是謂名為邪見之聚。邪見·災患·憂·悲·苦·惱。皆由此生而不可療治，亦復不能捨。遂增苦本。由是不為沙門之行·涅槃之道。

[0740c08] 又復。比丘。賢聖弟子修其法。不失次敘。善能擁護。與善知識共從事。彼能分別。不可思惟法亦能知。所可思惟法亦能知之。彼所不應思惟法亦不思惟之。所應思惟法而思惟之。

[0740c12] 彼云何不應思惟法而不思惟之？於是，諸法未生欲漏而生。已生欲漏而增多。未生有漏而生。已生有漏而增多。未生無明漏而生。已生無明漏而增多。是謂此法不應思惟之。

[0740c16] 彼何等法應思惟者而思惟之？於是。諸法未生欲漏而不生。已生欲漏而滅之。未生有漏而不生。已生有漏而滅之。未生無明漏而不生。已生無明漏而滅之。是謂此法應可思惟之。

[0740c21] 彼不應思惟者亦不思惟之。可思惟者便思惟之。彼作如是思惟。便滅三法。云何為三？身耶·戒盜·疑。設不知·見，則增有漏之行。設見·聞·念·知者，則不增有漏之行。已知·已見。有漏便不生，是謂此漏見所斷也。

[0740c26] 彼云何漏恭敬所斷？

於是。比丘。堪忍飢寒。勤苦風雨·蚊虻·惡言·罵辱。身生痛惱。極為煩疼。命垂欲斷。便能忍之。

若不爾者。便起苦惱。設復能堪忍者。如是不生。是謂此漏恭敬所斷。

[0741a01] 彼云何漏親近所斷？

於是。比丘。持心受衣。不興榮飾。但欲支其形體。欲除寒熱。欲令風雨不加之身。又覆形體不令外露。又持心隨時乞食。不起染著之心。但欲趣支形體。使故痛得差。新者不生。守護眾行。無所觸犯。長夜安隱而修梵行。久存於世。

復持心意親近床座。亦不著榮華服飾。但欲除飢寒·風雨·蚊虻之類。趣支其形。得行道法。又復持心親近醫藥。不生染著之心。於彼醫藥。但欲使疾病除愈故。身體得安隱。

設不親近者。則生有漏之患。若親近。則無有漏之患。是謂此漏親近所斷。

[0741a13] 彼云何有漏遠離所斷？

於是。比丘。除去亂想。猶如惡象·駱駝·牛·馬·虎·狼·狗·蛇虻·深

坑·危岸·柘棘·峻崖·濕泥。皆當遠離之。莫與惡知識從事。亦復不與惡人相近。能熟思惟不去心首。

設不將護者。則生有漏。設擁護者。則不生有漏。是謂有漏遠離所斷。

[0741a19] 彼云何有漏娛樂所斷？

於是。比丘。生欲想而不捨離。設起瞋恚想。亦不捨離。設復起疾想。亦不捨離。設不捨離者，則生有漏。能捨離者，便能不起有漏，是謂此漏娛樂所斷。

[0741a23] 云何有漏威儀所斷？

於此。比丘。若眼見色不起色想。亦不起染污之心。具足眼根。亦無缺漏而護眼根。

若耳聞聲·鼻嗅香·舌知味·身知細滑·意知法。都不起染污之心。亦不起想著而護意根。若不攝其威儀，則生有漏。若攝其威儀者，則無有漏之患。是謂此漏威儀所斷。

[0741a29] 彼何等有漏思惟所斷？

於是。比丘。修念覺意。依無欲、依無污、依滅盡而求出要。修法覺意·精進覺意·喜覺意·猗覺意·定覺意·護覺意。依無欲·依無污·依滅盡而求出要。若不修此者，則生有漏之患。設能修者，則不生有漏之患。是謂此漏思惟所斷。

[0741b06] 若復。比丘，於比丘中諸所有漏。見斷者便見斷之。恭敬斷者便恭敬斷之。親近斷者親近斷之。遠離斷者遠離斷之。威儀斷者威儀斷之。思惟斷者思惟斷之。是謂。比丘。具足一切威儀。能斷結·去愛。度於四流。漸漸越苦。是謂。比丘。除有漏之法。諸佛世尊常所施行，慈念一切有形之類。今已施行。汝等常樂閑居樹下。勤加精進。勿有懈怠。今不勤加者，後悔無益。此是我之訓教。

[0741b15] 爾時。比丘聞佛所說。歡喜奉行。

《中阿含七法品漏盡經第十》(初一日誦)

[0431c14] 我聞如是。

[0431c14] 一時。佛遊拘樓瘦。在劍磨瑟曇拘樓都邑。

[0431c15] 爾時。世尊告諸比丘。以知·以見故諸漏得盡。非不知·非不見也。云何以知·以見故諸漏得盡耶？有正思惟·不正思惟。

若不正思惟者。未生欲漏而生。已生便增廣。未生有漏·無明漏而生。已生便增廣。

若正思惟者。未生欲漏而不生。已生便滅。未生有漏·無明漏而不生。已生便

滅。

[0431c21] 然凡夫愚人不得聞正法。不值真知識。不知聖法。不調御聖法。不知如真法。不正思惟者。未生欲漏而生。已生便增廣。未生有漏·無明漏而生。已生便增廣。

正思惟者。未生欲漏而不生。已生便滅。未生有漏·無明漏而不生。已生便滅。不知如真法故。不應念法而念。應念法而不念。以不應念法而念。應念法而不念故。未生欲漏而生。已生便增廣。未生有漏·無明漏而生。已生便增廣。

[0432a01] 多聞聖弟子得聞正法。值真知識。調御聖法。知如真法。不正思惟者。未生欲漏而生。已生便增廣。未生有漏·無明漏而生。已生便增廣。正思惟者。未生欲漏而不生。已生便滅。未生有漏·無明漏而不生。已生便滅。知如真法已。不應念法不念。應念法便念。以不應念法不念。應念法便念故。未生欲漏而不生。已生便滅。未生有漏·無明漏而不生。已生便滅也。

[0432a10] 有七斷漏·煩惱·憂惑法。云何為七？有漏從見斷。有漏從護斷。有漏從離斷。有漏從用斷。有漏從忍斷。有漏從除斷。有漏從思惟斷。

[0432a13] 云何有漏從見斷耶？

凡夫愚人不得聞正法。不值真知識。不知聖法。不調御聖法。不知如真法。不正思惟故。便作是念。我有過去世。我無過去世。我何因過去世。我云何過去世耶？

我有未來世。我無未來世。我何因未來世。我云何未來世耶？自疑己身何謂。是云何是耶？今此眾生從何所來。當至何所。本何因有。當何因有。彼作如是不正思惟。於六見中隨其見生而生真有神。此見生而生真無神。此見生而生神見神。此見生而生神見非神。此見生而生非神見神。此見生而生此是神。能語·能知·能作·教·作起·教起。生彼彼處。受善惡報。定無所從來。定不有·定不當有。是謂見之弊。為見所動。見結所繫。凡夫愚人以是之故。便受生·老·病·死苦也。

[0432a28] 多聞聖弟子得聞正法。值真知識。調御聖法。知如真法。知苦如真。知苦習·知苦滅·知苦滅道如真。如是知如真已。則三結盡。身見·戒取·疑三結盡已。得須陀洹。不墮惡法。定趣正覺。極受七有。天上人間七往來已。便得苦際。若不知見者。則生煩惱·憂惑。知見則不生煩惱·憂惑。是謂有漏從見斷也。

[0432b06] 云何有漏從護斷耶？

比丘。眼見色護眼根者，以正思惟不淨觀也。不護眼根者，不正思惟，以淨觀也。若不護者，則生煩惱、憂感。護，則不生煩惱、憂感。

如是耳·鼻·舌·身·意知法。護意根者，以正思惟不淨觀也。不護意根者，不正思惟，以淨觀也。若不護者，則生煩惱·憂感。護，則不生煩惱·憂感。是謂有漏從護斷也。

[0432b13] 云何有漏從離斷耶？

比丘。見惡象則當遠離。惡馬·惡牛·惡狗·毒蛇·惡道·溝坑·屏廁·江河·深泉·山巖·惡知識·惡朋友·惡異道·惡閭里·惡居止。若諸梵行與其同處，人無疑者而使有疑，比丘者應當離。

惡知識·惡朋友·惡異道·惡閭里·惡居止。若諸梵行與其同處，人無疑者而使有疑，盡當遠離。若不離者。則生煩惱·憂感。

離則不生煩惱·憂感。是謂有漏從離斷也。

[0432b21] 云何有漏從用斷耶？

比丘。若用衣服。非為利故。非以貢高故。非為嚴飾故。但為蚊虻·風雨·寒熱故。以慚愧故也。若用飲食。非為利故。非以貢高故。非為肥悅故。但為令身久住。除煩惱·憂感故。以行梵行故。欲令故病斷。新病不生故。久住安隱無病故也。

若用居住房舍·床褥·臥具。非為利故。非以貢高故。非為嚴飾故。但為疲倦得止息故。得靜坐故也。

若用湯藥。非為利故。非以貢高故。非為肥悅故。但為除病惱故。攝御命根故。安隱無病故。

若不用者。則生煩惱·憂感。用則不生煩惱·憂感。是謂有漏從用斷也。

[0432c05] 云何有漏從忍斷耶？

比丘。精進斷惡不善。修善法故。常有起想。專心精勤。身體·皮肉·筋骨·血髓皆令乾竭。不捨精進。要得所求。乃捨精進。

比丘。復當堪忍飢渴·寒熱·蚊虻蠅蚤虱。風日所逼。惡聲捶杖。亦能忍之。身遇諸病。極為苦痛。至命欲絕。諸不可樂。皆能堪忍。

若不忍者。則生煩惱·憂感。忍則不生煩惱·憂感。是謂有漏從忍斷也。

[0432c13] 云何有漏從除斷耶？

比丘。生欲念不除斷捨離。生恚念、害念不除斷捨離。若不除者。則生煩惱·憂感。

除則不生煩惱·憂感。是謂有漏從除斷也。

[0432c16] 云何有漏從思惟斷耶？

比丘。思惟初念覺支。依離·依無欲·依於滅盡。起至出要。法、精進、喜、息、定。思惟第七捨覺支。依離依無欲依於滅盡。趣至出要。

若不思惟者。則生煩惱·憂戚。

思惟則不生煩惱·憂戚。是謂有漏從思惟斷也。

[0432c21] 若使比丘有漏從見斷則以見斷。有漏從護斷則以護斷。有漏從離斷則以離斷。有漏從用斷則以用斷。有漏從忍斷則以忍斷。有漏從除斷則以除斷。有漏從思惟斷則以思惟斷。是謂比丘一切漏盡諸結已解。能以正智而得苦際。

[0432c27] 佛說如是。彼諸比丘聞佛所說。歡喜奉行。

〈漏盡經第十竟〉《中阿含經卷第二》〈中阿含七法品第一竟〉

# 攝

《中阿含舍梨子相應品象跡喻經第十》(初一日誦)

[0464b19] 我聞如是。

[0464b19] 一時。佛遊舍衛國。在勝林給孤獨園。

[0464b20] 爾時。尊者舍梨子告諸比丘。諸賢！若有無量善法。彼一切法皆四聖諦所攝。來入四聖諦中。謂四聖諦於一切法最為第一。所以者何？攝受一切眾善法故。諸賢！猶如諸畜之跡。象跡為第一。所以者何？彼象跡者最廣大故。如是。諸賢！無量善法。彼一切法皆四聖諦所攝。來入四聖諦中。謂四聖諦於一切法最為第一。云何為四？謂苦聖諦。苦習·苦滅·苦滅道聖諦。諸賢！云何苦聖諦？謂生苦·老苦·病苦·死苦·怨憎會苦·愛別離苦·所求不得苦·略五盛陰苦。

[0464c01] 諸賢。云何五盛陰？謂色盛陰。覺·想·行·識盛陰。諸賢。云何色盛陰。謂有色。彼一切四大及四大造。諸賢。云何四大？謂地界。水·火·風界。諸賢。云何地界。諸賢。謂地界有二。有內地界。有外地界。諸賢。云何內地界？謂內身中在。內所攝堅。堅性住內之所受。此為云何。謂髮·毛·爪·齒·麤細皮膚·肌肉·筋·骨·心·腎·肝·肺·脾·腸·胃·糞。如是比此身中餘在。內所攝。堅性住。內之所受。諸賢。是謂內地界。諸賢。外地界者。謂大是。淨是。不憎惡是。諸賢。有時水災。是時滅外地界。

[0464c12] 諸賢。此外地界極大。極淨。極不憎惡。是無常法·盡法·衰法·變易之法。況復此身暫住。為愛所受。謂不多聞愚癡凡夫而作此念。是我。是我所。我是彼所。多聞聖弟子不作此念。是我。是我所。我是彼所。

彼云何作是念？若有他人罵詈·捶打·瞋恚責數者。彼作是念。我生此苦。從因緣生。非無因緣。云何為緣？緣苦更樂。彼觀此更樂無常。觀覺·想·行·識無常。彼心緣界住止·合一·心定·不移動。

彼於後時他人來語，柔辭軟言者。彼作是念。我生此樂。從因緣生。非無因緣。云何為緣？緣樂更樂。彼觀此更樂無常。觀覺·想·行·識·無常。彼心緣界住。止合一心。定不移動。

彼於後時。若幼少·中年·長老來行不可事。或以拳杖。或以石擲。或刀杖加。彼作是念。我受此身。色法羶質。四大之種。從父母生。飲食長養。常衣被覆。坐臥按摩。澡浴強忍。是破壞法。是滅盡法。離散之法。我因此身致拳杖·石擲及刀杖加。由是之故。彼極精勤而不懈怠。正身正念。不忘不癡。安定一心。彼作是念。我極精勤而不懈怠。正身正念。不忘不癡。安定一心。我受此身。應致拳杖·石擲及刀杖加。但當精勤學世尊法。

[0465a06] 諸賢。世尊亦如是說。若有賊來。以利刀鋸。節節解身。若汝為賊以利刀鋸節節解身時。或心變易、或惡語言者。汝則衰退。

汝當作是念。若有賊來。以利刀鋸節節解我身者。因此令我心不變易、不惡語言。當為彼節節解我身者起哀愍心。為彼人故，心與慈俱，遍滿一方成就遊。如是二三四方。四維上下。普周一切。心與慈俱。無結無怨。無恚無諍。極廣甚大。無量善修。遍滿一切世間成就遊。

[0465a15] 諸賢。彼比丘若因佛·法·眾。不住善相應捨者。諸賢。彼比丘應慙愧羞厭。我於利無利。於德無德。謂我因佛·法·眾。不住善相應捨。諸賢。猶如初迎新婦。見其姑嫜。若見夫主。則慙愧羞厭。諸賢。當知比丘亦復如是。應慙愧羞厭。我於利無利。於德無德。謂我因佛·法·眾。不住善相應捨。彼因慙愧羞厭故。便住善相應捨。是妙息寂。謂捨一切有。離愛·無欲·滅盡無餘。諸賢。是謂比丘一切大學。

[0465a24] 諸賢。云何水界。諸賢。謂水界有二。有內水界。有外水界。諸賢。云何內水界？謂內身中在。內所攝水。水性潤。內之所受。此為云何？謂腦·腦根。淚·汗·涕·唾·膿·血·肪·髓·涎·膽·小便。如是比此身中餘在。內所攝水。水性潤。內之所受。諸賢。是謂內水界。

諸賢。外水界者。謂大是。淨是。不憎惡是。諸賢。有時火災。是時滅外水界。

[0465b02] 諸賢。此外水界極大。極淨。極不憎惡。是無常法·盡法·衰法·變易之法。況復此身暫住。為愛所受。謂不多聞愚癡凡夫而作此念。是我。是我所。我是彼所。多聞聖弟子不作此念。是我。是我所。我是彼所。彼云何作是念。若有他人罵詈·捶打·瞋恚責數者。便作是念。我生此苦。從因緣生。

非無因緣。云何為緣？緣苦更樂。彼觀此更樂無常。觀覺·想·行·識無常。彼心緣界住。止合一心。定不移動。彼於後時。他人來語柔辭軟言者。彼作是念。我生此樂。從因緣生。非無因緣。云何為緣？緣樂更樂。彼觀此更樂無常。觀覺·想·行·識無常。彼心緣界住。止合一心。定不移動。彼於後時。若幼少·中年·長老來行不可事。或以拳杖。或以石擲。或刀杖加。彼作是念。我受此身。色法羸質。四大之種。從父母生。飲食長養。常衣被覆。坐臥按摩。澡浴強忍。是破壞法。是滅盡法。離散之法。我因此身致拳杖·石擲及刀杖加。由是之故。彼極精勤而不懈怠。正身正念。不忘不癡。安定一心。彼作是念。我極精勤而不懈怠。正身正念。不忘不癡。安定一心。我受此身應致拳杖·石擲及刀杖加。但當精勤學世尊法。

[0465b25] 諸賢。世尊亦如是說。若有賊來。以利刀鋸。節節解身。若汝為賊以利刀鋸節節解身時。或心變易。或惡語言者。汝則衰退。汝當作是念。若有賊來。以利刀鋸節節解我身者。因此令我心不變易。不惡語言。當為彼節節解我身者起哀愍心。為彼人故。心與慈俱。遍滿一方成就遊。如是二三四方。四維上下。普周一切。心與慈俱。無結無怨。無恚無諍。極廣甚大。無量善修。遍滿一切世間成就遊。

[0465c05] 諸賢。彼比丘若因佛·法·眾。不住善相應捨者。諸賢。彼比丘應慙愧羞厭。我於利無利。於德無德。謂我因佛·法·眾。不住善相應捨。諸賢。猶如初迎新婦。見其姑嫜。若見夫主。則慙愧羞厭。諸賢。當知比丘亦復如是。應慙愧羞厭。我於利無利。於德無德。謂我因佛·法·眾。不住善相應捨。彼因慙愧羞厭故。便住善相應捨。是妙息寂。謂捨一切有。離愛·無欲。滅盡無餘。諸賢。是謂比丘一切大學。

[0465c14] 諸賢。云何火界。諸賢。謂火界有二。有內火界。有外火界。諸賢。云何內火界？謂內身中在。內所攝火。火性熱。內之所受。此為云何？謂暖身·熱身·煩悶·溫壯·消化飲食。如是比此身中餘在。內所攝火。火性熱。內之所受。諸賢。是謂內火界。諸賢。外火界者。謂大是。淨是。不憎惡是。諸賢。有時外火界起。起已燒村邑·城郭·山林·曠野。燒彼已。或至道·至水。無受而滅。諸賢。外火界滅後。人民求火。或鑽木截竹。或以珠燧。

[0465c23] 諸賢。此外火界極大。極淨。極不憎惡。是無常法·盡法·衰法·變易之法。況復此身暫住。為愛所受。謂不多聞愚癡凡夫而作此念。是我。是我所。我是彼所。多聞聖弟子不作此念。是我。是我所。我是彼所。彼云何作是念。若有他人罵詈·捶打·瞋恚責數者。便作是念。我生此苦。從因緣生。非無因緣。云何為緣？緣苦更樂。彼觀此更樂無常。觀覺·想·行·

識無常。彼心緣界住。止合一心。定不移動。彼於後時。他人來語柔辭軟言者。彼作是念。我生此樂。從因緣生。非無因緣。云何為緣？緣樂更樂。彼觀此更樂無常。觀覺·想·行·識無常。彼心緣界住。止合一心。定不移動。彼於後時。若幼少·中年·長老來行不可事。或以拳擧。或以石擲。或刀杖加。彼作是念。我受此身。色法羸質。四大之種。從父母生。飲食長養。常衣被覆。坐臥按摩。澡浴強忍。是破壞法。是滅盡法。離散之法。我因此身致拳擧·石擲及刀杖加。由是之故。彼極精勤而不懈怠。正身正念。不忘不癡。安定一心。彼作是念。我極精勤而不懈怠。正身正念。不忘不癡。安定一心。我受此身應致拳擧·石擲及刀杖加。但當精勤學世尊法。

[0466a17] 諸賢。世尊亦如是說。若有賊來。以利刀鋸。節節解身。若汝為賊以利刀鋸節節解身時。或心變易。或惡語言者。汝則衰退。汝當作是念。若有賊來。以利刀鋸節節解我身者。因此令我心不變易。不惡語言。當為彼節節解我身者起哀愍心。為彼人故。心與慈俱。遍滿一方成就遊。如是二三四方。四維上下。普周一切。心與慈俱。無結無怨。無恚無諍。極廣甚大。無量善修。遍滿一切世間成就遊。

[0466a26] 諸賢。彼比丘若因佛·法·眾。不住善相應捨者。諸賢。彼比丘應慙愧羞厭。我於利無利。於德無德。謂我因佛·法·眾。不住善相應捨。諸賢。猶如初迎新婦。見其姑嫜。若見夫主。則慙愧羞厭。諸賢。當知比丘亦復如是。應慙愧羞厭。我於利無利。於德無德。謂我因佛·法·眾。不住善相應捨。彼因慙愧羞厭故。便住善相應捨。是妙息寂。謂捨一切有。離愛·無欲。滅盡無餘。諸賢。是謂比丘一切大學。

[0466b06] 諸賢。云何風界。諸賢。謂風界有二。有內風界。有外風界。諸賢。云何內風界？謂內身中在。內所攝風。風性動。內之所受。此為云何？謂上風·下風·腹風·行風·掣縮風·刀風·躋風·非道風·節節行風·息出風·息入風。如是比此身中餘在。內所攝風。風性動。內之所受。諸賢。是謂內風界。諸賢。外風界者。謂大是。淨是。不憎惡是。諸賢。有時外風界起。風界起時撥。屋拔樹。崩山。山巖撥已便止。纖毫不動。諸賢。外風界止後。人民求風。或以其扇。或以哆邏葉。或以衣求風。

[0466b17] 諸賢。此風界極大。極淨。極不憎惡。是無常法·盡法·衰法·變易之法。況復此身暫住。為愛所受。謂不多聞愚癡凡夫而作此念。是我。是我所。我是彼所。多聞聖弟子不作此念。是我。是我所。我是彼所。彼云何作是念。若有他人罵詈·捶打·瞋恚責數者。便作是念。我生此苦。從因緣生。非無因緣。云何為緣？緣苦更樂。彼觀此更樂無常。觀覺·想·行·識無常。彼心緣界住。止合一心。定不移動。

彼於後時。他人來語柔辭軟言者。彼作是念。我生此樂。從因緣生。非無因緣。云何為緣？緣樂更樂。彼觀此更樂無常。觀覺·想·行·識無常。彼心緣界住。止合一心。定不移動。彼於後時。若幼少·中年·長老來行不可事。或以拳擗。或以石擲。或刀杖加。彼作是念。我受此身。色法羸質。四大之種。從父母生。飲食長養。常衣被覆。坐臥按摩。澡浴強忍。是破壞法。是滅盡法。離散之法。我因此身致拳擗·石擲及刀杖加。

由是之故。彼極精勤而不懈怠。正身正念。不忘不癡。安定一心。彼作是念。我極精勤而不懈怠。正身正念。不忘不癡。安定一心。我受此身應致拳擗·石擲及刀杖加。但當精勤學世尊法。

[0466c10] 諸賢。世尊亦如是說。若有賊來。以利刀鋸。節節解身。若汝為賊以利刀鋸節節解身時。或心變易。或惡語言者。汝則衰退。汝當作是念。若有賊來。以利刀鋸節節解我身者。因此令我心不變易。不惡語言。當為彼節節解我身者起哀愍心。為彼人故。心與慈俱。遍滿一方成就遊。如是二三四方。四維上下。普周一切。心與慈俱。無結無怨。無恚無諍。極廣甚大。無量善修。遍滿一切世間成就遊。

[0466c19] 諸賢。彼比丘若因佛·法·眾。不住善相應捨者。諸賢。彼比丘應慙愧羞厭。我於利無利。於德無德。謂我因佛·法·眾。不住善相應捨。諸賢。猶如初迎新婦。見其姑嫜。若見夫主。則慙愧羞厭。諸賢。當知比丘亦復如是。應慙愧羞厭。我於利無利。於德無德。謂我因佛·法·眾。不住善相應捨。彼因慙愧羞厭故。便住善相應捨。是妙息寂。謂捨一切有。離愛·無欲。滅盡無餘。諸賢。是謂比丘一切大學。

[0466c28] 諸賢。猶如因材木。因泥土。因水草。覆裹於空。便生屋名。諸賢。當知此身亦復如是。因筋骨。因皮膚。因肉血。纏裹於空。便生身名。諸賢。若內眼處壞者。外色便不為光明所照。則無有念。眼識不得生。諸賢。若內眼處不壞者。外色便為光明所照。而便有念。眼識得生。諸賢。內眼處及色。眼識知外色。是屬色陰。若有覺是覺陰。若有想是想陰。若有思是思陰。若有識是識陰。如是觀陰合會。

[0467a09] 諸賢。世尊亦如是說。若見緣起便見法。若見法便見緣起。所以者何？諸賢。世尊說五盛陰從因緣生。色盛陰。覺·想·行·識盛陰。諸賢。若內耳·鼻·舌·身·意處壞者。外法便不為光明所照。則無有念。意識不得生。諸賢。若內意處不壞者。外法便為光明所照而便有念。意識得生。諸賢。內意處及法。意識知外色法。是屬色陰。若有覺是覺陰。若有想是想陰。若有思是思陰。若有識是識陰。如是觀陰合會。諸賢。世尊亦如是說。若見緣起便見

法。若見法便見緣起。所以者何？

諸賢。世尊說五盛陰從因緣生。色盛陰。覺·想·行·識盛陰。彼厭此過去·未來·現在五盛陰。厭已便無欲。無欲已便解脫。解脫已便知解脫。生已盡。梵行已立。所作已辦。不更受有。知如真。諸賢。是謂比丘一切大學。

[0467a24] 尊者舍梨子所說如是。彼諸比丘聞尊者舍梨子所說。歡喜奉行。

[0467a27] 《象跡喻經第十竟》

# 集諦《雜阿含經卷 35》(九八四)

[0256a17] 如是我聞：

[0256a17] 一時，佛住舍衛國祇樹給孤獨園。

[0256a18] 爾時，世尊告諸比丘：「我今當說愛為網、為膠、為泉、為藕根。此等能為眾生障、為蓋、為膠、為守衛、為覆、為閉、為塞、為闇冥、為狗腸、為亂草、為絮，從此世至他世，從他世至此世，往來流轉，無不轉時。諸比丘！何等愛為網、為膠，乃至往來流馳，無不轉？謂有我故有：我、欲我、爾我、有我、無我、異我、當我、不當我、欲我、當爾時、當異異我、或欲我、或爾我、或異、或然、或欲然、或爾然、或異。如是十八愛行從內起。」

[0256a27] 比丘言：「有我，於諸所有，言我、欲我、爾，乃至十八愛行從外起，如是總說十八愛行。如三十六愛行，或於過去起，或於未來起，或於現在起。如是總說百八愛行，是名為愛、為網、為膠、為泉、為藕根，能為眾生障、為蓋、為膠、為守衛、為覆、為閉、為塞、為闇冥、為狗腸、為亂草、為絮，從此世至他世，從他世至此世，往來流馳，無不轉時。」

[0256b06] 佛說是經已，諸比丘聞佛所說，歡喜奉行。

(九八五)

[0256b08] 如是我聞：

[0256b08] 一時，佛住舍衛國祇樹給孤獨園。

[0256b09] 爾時，世尊告諸比丘：「有從愛生愛，從愛生恚；從恚生愛，從恚生恚。」

[0256b10] 「云何為從愛生愛？

謂有一於眾生有喜、有愛、有念、有可意，他於彼有喜、有愛、有念、有可意隨行此，作是念：『我於彼眾生有喜、有愛、有念、有可意，他復於彼有喜、有愛、有念、有可意隨行故，我於他人復生於愛。』是名從愛生愛。」

[0256b16] 「云何從愛生恚？」

謂有一於眾生有喜、有愛、有念、有可意，而他於彼不喜、不愛、不念、不可意隨行此，作是念：『我於眾生有喜、有愛、有念、有可意，而他於彼不喜、不愛、不念、不可意隨行故，我於他而生瞋恚。』是名從愛生恚。

[0256b21] 「云何為從恚生愛？」

謂有一於眾生不喜、不愛、不念、不可意，他復於彼不喜、不愛、不念、不可意隨行故，我於他而生愛念，是名從恚生愛。

[0256b25] 「云何從恚生恚？」

謂有一於眾生不喜、不愛、不念、不可意，而他於彼有喜、有愛、有念、有可意隨行此，作是念：『我於彼眾生不喜、不愛、不念、不可意，而他於彼有喜、有愛、有念、有可意隨行，我於他所問起瞋恚。』是名從恚生恚。

[0256c01] 「若比丘離欲、惡不善法，有覺有觀，乃至初禪、第二、第三、第四禪具足住者，從愛生愛、從恚生恚、從恚生愛、從愛生恚已斷已知，斷其根本，如截多羅樹頭，無復生分，於未來世成不生法。

[0256c06] 「若彼比丘盡諸有漏，無漏心解脫、慧解脫，現法自知作證：『我生已盡，梵行已立，所作已作，自知不受後有。』當於爾時，不自舉，不起塵，不熾然，不嫌彼。

[0256c09] 「云何自舉？謂見色是我、色異我、我中色、色中我。受、想、行、識亦復如是，是名自舉。

云何不自舉？謂不見色是我、色異我、我中色、色中我。受、想、行、識亦復如是，是名不自舉。

云何還舉？謂於罵者還罵，瞋者還瞋，打者還打，觸者還觸，是名還舉。

云何不還舉？謂罵者不還罵，瞋者不還瞋，打者不還打，觸者不還觸，是名不還舉。

[0256c17] 「云何起塵？謂有我、我欲，乃至十八種愛，是名起塵。

云何不起塵？謂無我、無我欲，乃至十八愛不起，是名不起塵。

[0256c19] 「云何熾然？謂有所、我所欲，乃至外十八愛行，是名熾然。云何不熾然？謂無我所、無我所欲，乃至無外十八愛行，是名不熾然。

[0256c22] 「云何嫌彼？謂見我真實起，於我慢、我欲、我使不斷不知，是名嫌彼。

云何不嫌彼？謂不見我真實，我慢、我欲、我使已斷已[16]知，是名不嫌彼。」

[0256c25] 佛說此經已，諸比丘聞佛所說，歡喜奉行。

#得《雜阿含經卷 15》(三七九)《轉法輪經》

[0103c13] 如是我聞：

[0103c13] 一時，佛住波羅[木\*奈]鹿野苑中仙人住處。

[0103c14] 爾時，世尊告五比丘：「此苦聖諦，本所未曾聞法，當正思惟。時，生眼、智、明、覺，此苦集、此苦滅、此苦滅道跡聖諦，本所未曾聞法，當正思惟。時，生、眼、智、明、覺。

[0103c17] 「復次，苦聖諦智當復知，本所未聞法，當正思惟。時，生眼、智、明、覺，苦集聖諦已知當斷，本所未曾聞法，當正思惟。時，生眼、智、明、覺。

[0103c20] 「復次，苦集滅，此苦滅聖諦已知當知作證，本所未聞法，當正思惟。時，生眼、智、明、覺，復以此苦滅道跡聖諦已知當修，本所未曾聞法，當正思惟。時，生眼、智、明、覺。

[0103c24] 「復次，比丘！此苦聖諦已知，知已出，所未聞法，當正思惟。時，生眼、智、明、覺；復次，此苦集聖諦已知，已斷出，所未聞法，當正思惟。時，生眼、智、明、覺。

[0103c27] 「復次，苦滅聖諦已知、已作證出，所未聞法，當正思惟。時，生眼、智、明、覺；復次，苦滅道跡聖諦已知、已修出，所未曾聞法，當正思惟。時，生眼、智、明、覺。

[0104a02] 「諸比丘！我於此四聖諦三轉十二行不生眼、智、明、覺者，我終不得於諸天、魔、梵、沙門、婆羅門聞法眾中，為解脫、為出、為離，亦不自證得阿耨多羅三藐三菩提。

我已於四聖諦三轉十二行生眼、智、明、覺，故於諸天、魔、梵、沙門、婆羅門聞法眾中，得出、得脫，自證得成阿耨多羅三藐三菩提。」

[0104a08] 爾時，世尊說是法時，尊者憍陳如及八萬諸天遠塵離垢，得法眼淨。

[0104a10] 爾時，世尊告尊者憍陳如：「知法未？」

[0104a11] 橋陳如白佛：「已知。世尊！」

[0104a11] 復告尊者橋陳如：「知法未？」

[0104a12] 拘隣白佛：「已知。善逝！」

[0104a12] 尊者拘隣已知法故，是故名阿若拘隣。

[0104a13] 尊者阿若拘隣知法已，地神舉聲唱言：「諸仁者！世尊於波羅[木\*奈]國仙人住處鹿野苑中三轉十二行法輪，諸沙門、婆羅門、諸天、魔、梵所未曾轉，多所饒益，多所安樂，哀愍世間，以義饒益，利安天人，增益諸天眾，減損阿修羅眾。」

[0104a19] 地神唱已，聞虛空神天、四天王天、三十三天、炎魔天、兜率陀天、化樂天、他化自在天展轉傳唱，須臾之間，聞于梵天身。梵天乘聲唱言：「諸仁者，世尊於波羅[木\*奈]國仙人住處鹿野苑中三轉十二行法輪，諸沙門、婆羅門、諸天、魔、梵，及世間聞法未所曾轉，多所饒益，多所安樂，以義饒益諸天世人，增益諸天眾，減損阿修羅眾。」世尊於波羅[木\*奈]國仙人住處鹿野苑中轉法輪，是故此經名《轉法輪經》。

[0104a28] 佛說此經已，諸比丘聞佛所說，歡喜奉行。

(三八〇) # 諦瑜伽

[0104b01] 如是我聞：

[0104b01] 一時，佛住波羅[木\*奈]仙人住處鹿野苑中。

[0104b02] 爾時，世尊告諸比丘：「有四聖諦。何等為四？謂苦聖諦、苦集聖諦、苦滅聖諦、苦滅道跡聖諦。」

[0104b04] 佛說此經已，諸比丘聞佛所說，歡喜奉行。

(三八一)

[0104b06] 如是我聞：

[0104b06] 一時，佛住波羅[木\*奈]仙人住處鹿野苑中。

[0104b07] 爾時，世尊告諸比丘：「有四聖諦。何等為四？謂苦聖諦、苦集聖諦、苦滅聖諦、苦滅道跡聖諦。若比丘於此四聖諦未無間等者，當修無間等，起增上欲，方便堪能，正念正知應當覺。」

[0104b11] 佛說此經已，諸比丘聞佛所說，歡喜奉行。

(三八二)

[0104b13] 如是我聞：

[0104b13] 一時，佛住波羅[木\*奈][\*]仙人住處鹿野苑中。

[0104b14] 爾時，世尊告諸比丘：「有四聖諦。何等為四？謂苦聖諦、苦集聖諦、苦滅聖諦、苦滅道跡聖諦。若比丘於苦聖諦當知、當解，於集聖諦當知、當斷，於苦滅聖諦當知、當證，於苦滅道跡聖諦當知、當修。」

[0104b18] 佛說此經已，諸比丘聞佛所說，歡喜奉行。

（三八三）

[0104b20] 如是我聞：

[0104b20] 一時，佛住波羅[木\*奈][\*]仙人住處鹿野苑中。

[0104b21] 爾時，世尊告諸比丘：「有四聖諦。何等為四？謂苦聖諦、苦集聖諦、苦滅聖諦、苦滅道跡聖諦。若比丘於苦聖諦已知、已解，於苦集聖諦已知、已斷，於苦滅聖諦已知、已證，於苦滅道跡聖諦已知、已修。如是比丘則斷愛欲，轉去諸結，於慢、無明等究竟苦邊。」

[0104b27] 佛說此經已，諸比丘聞佛所說，歡喜奉行。

（三八四）

[0104b29] 如是我聞：

[0104b29] 一時，佛住波羅[木\*奈]仙人住處鹿野苑中。

[0104c01] 爾時，世尊告諸比丘：「有四聖諦。何等為四？謂苦聖諦、苦集聖諦、苦滅聖諦、苦滅道跡聖諦。若比丘於苦聖諦已知、已解，於苦集聖諦已知、已斷，於苦滅聖諦已知、已證，於苦滅道跡聖諦已知、已修。如是比丘名阿羅漢，諸漏已盡，所作已作，離諸重擔，逮得已利，盡諸有結，正智善解脫。」

[0104c08] 佛說此經已，諸比丘聞佛所說，歡喜奉行。

（三八五）

[0104c09] 如是我聞：

[0104c09] 一時，佛住波羅[木\*奈]國仙人住處鹿野苑中。

[0104c10] 爾時，世尊告諸比丘：「有四聖諦。何等為四？謂苦聖諦、苦集聖諦、苦滅聖諦、苦滅道跡聖諦。若比丘於苦聖諦已知、已解，於苦集聖諦已知、已斷，於苦滅聖諦已知、已證，於苦滅道跡聖諦已知、已修。如是比丘邊際、究竟邊際、離垢邊際，梵行已終，純一清白，名為上士。」

[0104c16] 佛說此經已，諸比丘聞佛所說，歡喜奉行。

（三八六）

[0104c18] 如是我聞：

[0104c18] 一時，佛住波羅[木\*奈]國仙人住處鹿野苑中。

[0104c19] 爾時，世尊告諸比丘：「有四聖諦。何等為四？謂苦聖諦、苦集聖諦、苦滅聖諦、苦滅道跡聖諦。若比丘於苦聖諦已知、已解，於苦集聖諦已知、已斷，於苦滅聖諦已知、已證，於苦滅道跡聖諦已知、已修。如是比丘無有關鍵，平治城塹，度諸嶮難，解脫結縛，名為賢聖，建立聖幢。」

[0104c25] 佛說此經已，諸比丘聞佛所說，歡喜奉行。

（三八七）

[0104c27] 如是我聞：

[0104c27] 一時，佛住波羅[木\*奈][\*]仙人住處鹿野苑中。

[0104c28] 爾時，世尊告諸比丘：「有四聖諦。何等為四？謂苦聖諦、苦集聖諦、苦滅聖諦、苦滅道跡聖諦。若比丘於苦聖諦已知、已解，於苦集聖諦已知、已斷，於苦滅聖諦已知、已證，於苦滅道跡聖諦已知、已修。如是比丘無有關鍵，平治城塹，度諸峻難，名為賢聖，建立聖幢。

諸比丘！云何無有關鍵？謂五下分結已斷、已知，是名離關鍵。

云何平治城塹，無明謂之深塹，彼得斷知，是名平治城塹。

云何度諸嶮難？謂無際生死，究竟苦邊，是名度諸嶮難。

云何解脫結縛？謂愛已斷、已知。

云何建立聖幢？謂我慢已斷、已知，是名建立聖幢。」

[0105a11] 佛說此經已，諸比丘聞佛所說，歡喜奉行。

（三八八）

[0105a13] 如是我聞：

[0105a13] 一時，佛住波羅[木\*奈]國仙人住處鹿野苑中。

[0105a14] 爾時，世尊告諸比丘：「有四聖諦。何等為四？謂苦聖諦、苦集聖諦、苦滅聖諦、苦滅道跡聖諦。若比丘於苦聖諦已知、已解，於苦集聖諦已知、已斷，於苦滅聖諦已知、已證，於苦滅道跡聖諦已知、已修，是名比丘斷五支，成六分，守護於一，依猗於四，捨除諸諦，離四衢，證諸覺想，自身所作，心善解脫，慧善解脫，純一清白，名為上士。」

[0105a22] 佛說此經已，諸比丘聞佛所說，歡喜奉行。

(三八九)(喻諦建立)

[0105a24] 如是我聞：

[0105a24] 一時，佛住波羅[木\*奈]國仙人住處鹿野苑中。

[0105a25] 爾時，世尊告諸比丘：「有四法成就，名曰大醫王者，所應王之具、王之分。何等為四？一者善知病，二者善知病源，三者善知病對治，四者善知治病已，當來更不動發。

云何名良醫善知病？謂良醫善知如是如是種種病，是名良醫善知病。

云何良醫善知病源？謂良醫善知此病因風起、瘴陰起、涎唾起、眾冷起、因現事起、時節起，是名良醫善知病源。

云何良醫善知病對治？謂良醫善知種種病，應塗藥、應吐、應下、應灌鼻、應熏、應取汗。如是比種種對治，是名良醫善知對治。

云何良醫善知治病已，於未來世永不動發？謂良醫善治種種病，令究竟除，於未來世永不復起，是名良醫善知治病，更不動發。

[0105b10] 「如來、應、等正覺為大醫王，成就四德，療眾生病，亦復如是。

云何為四？謂如來知此是苦聖諦如實知、此是苦集聖諦如實知、此是苦滅聖諦如實知、此是苦滅道跡聖諦如實知。

諸比丘！彼世間良醫於生根本對治不如實知，老、病、死、憂、悲、惱、苦根本對治不如實知，如來、應、等正覺為大醫王，於生根本知對治如實知，於老、病、死、憂、悲、惱、苦根本對治如實知，是故如來、應、等正覺名大醫王。」

[0105b19] 佛說此經已，諸比丘聞佛所說，歡喜奉行。

(三九〇) # 相

[0105b21] 如是我聞：

[0105b21] 一時，佛住波羅[木\*奈]國仙人住處鹿野苑中。

[0105b22] 爾時，世尊告諸比丘：「若諸沙門、婆羅門於此苦聖諦不如實知，此苦集聖諦不如實知，此苦滅聖諦不如實知，此苦滅道跡聖諦不如實知，此非沙門之沙門，非婆羅門之婆羅門，彼亦不於沙門義、婆羅門義見法自知作證：『我生已盡，梵行已立，所作已作，自知不受後有。』」

[0105b28] 「若沙門、婆羅門於此苦聖諦如實知，此苦集聖諦如實知，此苦滅聖諦如實知，此苦滅道跡聖諦如實知，當知是沙門、婆羅門，沙門之沙門、婆羅門之婆羅門，於沙門義、婆羅門義見法自知作證：『我生已盡，梵行已立，所作已作，自知不受後有。』是故，比丘！於四聖諦無間等當起增上欲，精勤堪

能，方便修學。何等為四？謂苦聖諦、苦集聖諦、苦滅聖諦、苦滅道跡聖諦。」

[0105c07] 佛說此經已，諸比丘聞佛所說，歡喜奉行。

(三九一)

[0105c09] 如是我聞：

[0105c09] 一時，佛住波羅[木\*奈]國仙人住處鹿野苑中……廣說如上。

差別者：「於四聖諦不如實知，當知是沙門、婆羅門，非沙門數、非婆羅門數；於四聖諦如實知者，是沙門數、是婆羅門數。」乃至……。

[0105c13] 佛說此經已，諸比丘聞佛所說，歡喜奉行。

(三九二)

[0105c15] 如是我聞：

[0105c15] 一時，佛住波羅[木\*奈]國仙人住處鹿野苑中。

[0105c16] 爾時，世尊告諸比丘：「若沙門、婆羅門於苦聖諦不如實知，苦集聖諦不如實知，苦滅聖諦不如實知，苦滅道跡聖諦不如實知，當知是沙門、婆羅門不得脫苦。若沙門、婆羅門於苦聖諦如實知，於苦集聖諦如實知，於苦滅聖諦如實知，於苦滅道跡聖諦如實知，當知是沙門、婆羅門解脫於苦。」

[0105c23] 佛說此經已，諸比丘聞佛所說，歡喜奉行。

[0105c25] 「如於苦不解脫、解脫。如是捨惡趣不解脫、解脫，堪能捨戒退減，不捨戒退減，能自說得過人法自證，不能自說得過人法作證，能於此外求良福田，不能於此外求良福田。

[0106a01] 「能於此外求大師，不能於此外求大師，不能越苦，堪能越苦，不堪能脫苦，堪能脫苦。」

[0106a04] 如是上諸經重說悉繼以偈：

「若不知苦者，	及彼眾苦因，	一切諸苦法，	寂滅永無餘。
若不知道跡，	能思一切苦，	心解脫於苦，	慧解脫亦然。
不能越眾苦，	令苦究竟脫，	若如實知苦，	亦知眾苦因。
及一切諸苦，	永滅盡無餘，	若復如實知，	息苦之道跡。
意解脫具足，	慧解脫亦然，	堪能越眾苦，	究竟得解脫。」

[0106a15] 佛說此經已，諸比丘聞佛所說，歡喜奉行。

(三九三) # 處

[0106a16] 如是我聞：

[0106a16] 一時，佛住波羅[木\*奈]國仙人住處鹿野苑中。

[0106a17] 爾時，世尊告諸比丘：「若善男子正信非家，出家學道，彼一切所應當知四聖諦法。何等為四？謂知苦聖諦、知苦集聖諦、知苦滅聖諦、知苦滅道跡聖諦。是故，比丘！於四聖諦未無間等者，當勤方便，修無間等，如此章句，一切四聖諦經，應當具說。」

[0106a23] 佛說此經已，諸比丘聞佛所說，歡喜奉行。

[0106a25] 「如是知、如是見、如是無間等，悉應當說。又三結盡，得須陀洹，一切當知四聖諦。何等為四？謂知苦聖諦、知苦集聖諦、知苦滅聖諦、知苦滅道跡聖諦。如是當知、如是當見無間等。」

[0106a29] 佛說此經已，諸比丘聞佛所說，歡喜奉行。

[0106b02] 「若三結盡，貪、恚、癡薄，得斯陀含，彼一切皆於四聖諦如實知故。何等為四？謂知苦聖諦、知苦集聖諦、知苦滅聖諦、知苦滅道跡聖諦。如是當知、如是當見、如是無間等，亦如是說。」

[0106b06] 「五下分結盡，生般涅槃阿那含，不還此世，彼一切知四聖諦。何等為四？知苦聖諦、知苦集聖諦、知苦滅聖諦、知苦滅道跡聖諦。如是知、如是見、如是無間等，亦如是說。」

[0106b10] 「若一切漏盡，無漏心解脫、慧解脫，見法自知作證：『我生已盡，梵行已立，所作已作，自知不受後有。』彼一切悉知四聖諦。何等為四？謂知苦聖諦、知苦集聖諦、知苦滅聖諦、知苦滅道跡聖諦。如是知、如是見、如是無間等，亦如是說。」

[0106b15] 「若得辟支佛道證，彼一切知四聖諦故。何等為四？謂知苦聖諦、知苦集聖諦、知苦滅聖諦、知苦滅道跡聖諦。如是知、如是見、如是無間等，亦如是說。」

[0106b18] 「若得無上等正覺，彼一切知四聖諦故。何等為四？謂知苦聖諦、知苦集聖諦、知苦滅聖諦、知苦滅道跡聖諦。如是知、如是見、如是無間等，亦如是說。」

[0106b22] 佛說此經已，諸比丘聞佛所說，歡喜奉行。

(三九四) # 業

[0106b24] 如是我聞：

[0106b24] 一時，佛住波羅[木\*奈]國仙人住處鹿野苑中。

[0106b25] 爾時，世尊告諸比丘：「譬如日出，明相先起。如是正盡苦亦有前相起？謂知四聖諦。何等為四？知苦聖諦、知苦集聖諦、知苦滅聖諦、知苦滅道跡聖諦。」

[0106b28] 佛說此經已，諸比丘聞佛所說，歡喜奉行。

[0106c01] 如是知。如是見。如是無間等，亦如是說。

(三九五)

[0106c02] 如是我聞：

[0106c02] 一時，佛住波羅[木\*奈]國仙人住處鹿野苑中。

[0106c03] 爾時，世尊告諸比丘：「若日月不出世間者，一切眾星亦不出於世間，晝夜、半月、一月、時節、歲數、剋數、須臾，皆悉不現，世間常冥，無有明照，唯有長夜，純大闇苦現於世間。

若如來、應供、等正覺不出世間時，不說苦聖諦、苦集聖諦、苦滅聖諦、苦滅道跡聖諦現於世間，世間盲冥，無有明照。如是長夜，純大闇冥現於世間。

[0106c11] 「若日月出於世間，眾星亦現，晝夜、半月、一月、時節、歲數、剋數、須臾，悉現世間，長夜明照，出於世間。如是，如來、應、等正覺出於世間，說苦聖諦現於世間，苦集聖諦、苦滅聖諦、苦滅道跡聖諦現於世間，不復闇冥，長夜照明，純一智慧現於世間。」

[0106c16] 佛說此經已，諸比丘聞佛所說，歡喜奉行。

(三九六)

[0106c18] 如是我聞：

[0106c18] 一時，佛住波羅[木\*奈]國仙人住處鹿野苑中。

[0106c19] 爾時，世尊告諸比丘：「譬如日出，周行空中，壞諸闇冥，光明顯照。如是，聖弟子所有集法，一切滅已，離諸塵垢，得法眼生，與無間等，俱三結斷。所謂身見、戒取、疑，此三結盡，名須陀洹，不墮惡趣法，必定正覺，趣七有天人往生，作苦邊。

彼聖弟子中間雖起憂苦，聽彼聖弟子離欲、惡不善法，有覺有觀，離生喜樂，初禪具足住。不見彼聖弟子有一法不斷，能令還生此世者，此則聖弟子得法眼之大義。是故，比丘於此四聖諦未無間等者，當勤方便，起增上欲，精進修

學。」

[0107a01] 佛說是經已，諸比丘聞佛所說，歡喜奉行。

(三九七)

[0107a03] 如是我聞：

[0107a03] 一時，佛住波羅[木\*奈]國仙人住處鹿野苑中。

[0107a04] 爾時，世尊告諸比丘：「當作是說，我於苦聖諦未無間等，苦集聖諦、苦滅聖諦未無間等。而言我當得苦滅道跡聖諦無間等者，此說不應。所以者何？無是處故。

[0107a08] 「若苦聖諦、苦集聖諦、苦滅聖諦未無間等，而欲苦滅道跡聖諦無間等者，無有是處。譬如有人言我欲取佉提羅葉，合集作器，盛水持行者，無有是處。所以者何？無是處故。

如是言我於苦聖諦、苦集聖諦、苦滅聖諦未無間等，而欲得苦滅道跡聖諦無間等者，無有是處。

[0107a14] 「若復有言我當於苦聖諦、苦集聖諦、苦滅聖諦無間等已得，復得苦滅道跡聖諦者，斯則善說。所以者何？有是處故。

[0107a17] 「若苦聖諦、苦集聖諦、苦滅聖諦無間等已，而欲苦滅道跡聖諦無間等者，斯有是處。譬如有言我以純曇摩葉、摩樓迦葉，合集盛水持行者，此則善說。所以者何？有是處故。

如是若言我於苦聖諦、苦集聖諦、苦滅聖諦無間等已，而欲苦滅道跡聖諦無間等者，斯則善說。所以者何？有是處故，若於苦聖諦、苦集聖諦、苦滅聖諦無間等已，而欲苦滅道跡聖諦無間等者，斯有是處故。」

[0107a26] 佛說是經已，諸比丘聞佛所說，歡喜奉行。

(三九八)

[0107a28] 如是我聞：

[0107a28] 一時，佛住波羅[\*][木\*奈]國仙人住處鹿野苑中。

[0107a29] 爾時，世尊告諸比丘：「如小綿丸、小劫貝華丸，置四衢道頭，四方風吹，則隨風去，向於一方。如是，若沙門、婆羅門於苦聖諦不如實知，於苦集聖諦、於苦滅聖諦、苦滅道跡聖諦不如實知，當知彼沙門、婆羅門常觀他面，常隨他說，以不如實知故，聞彼所說，趣說而受，當知此人不宿修習智慧故。

[0107b07] 「譬如因陀羅柱，銅鐵作之，於深入地中，四方猛風不能令動。如是，沙門、婆羅門於苦聖諦如實知，苦集聖諦、苦滅聖諦、苦滅道跡聖諦如實知者，當知是沙門、婆羅門不視他面，不隨他語。是沙門、婆羅門智慧堅固，本隨習故，不隨他語。是故，比丘！於四聖諦當勤方便，起增上欲，精進修學。」

[0107b14] 佛說是經已，諸比丘聞佛所說，歡喜奉行。

(三九九)

[0107b16] 如是我聞：

[0107b16] 一時，佛住波羅[木\*奈]國仙人住處鹿野苑中。

[0107b17] 爾時，世尊告諸比丘：「譬如石柱，長十六肘，八肘入地，四方風吹，不能令動。如是，沙門、婆羅門於苦聖諦如實知，於苦集聖諦，苦滅聖諦，苦滅道跡聖諦如實知，斯等沙門、婆羅門至諸論處，無能屈。其心解脫、慧解脫者，能使餘沙門、婆羅門反生憂苦。如是如實知、如實見，皆是先世宿習故，使智慧不可傾動。是故，比丘！於四聖諦當勤方便，起增上欲，精進修學。」

[0107b25] 佛說是經已，諸比丘聞佛所說，歡喜奉行。

(四〇〇)

[0107b27] 如是我聞：

[0107b27] 一時，佛住波羅[木\*奈]國仙人住處鹿野苑中。

[0107b28] 爾時，世尊告諸比丘：「譬如有人火燒頭衣，當起增上欲，急救令滅。」

[0107c01] 佛告比丘：「莫作是說！當置頭衣，於四聖諦起增上欲，勤加方便，修無間等。何等四？謂苦聖諦、苦集聖諦、苦滅聖諦、苦滅道跡聖諦未無間等，當勤方便，修無間等。所以者何？比丘！長夜熾然，地獄、畜生、餓鬼。諸比丘！不見極苦，如苦聖諦、苦集聖諦、苦滅聖諦、苦滅道跡聖諦，未無間等者，是比丘當忍苦、樂、憂、悲，於四聖諦勤加精進，方便修習無間等，應當學。」

[0107c09] 佛說是經已，諸比丘聞佛所說，歡喜奉行。

(四〇一)

[0107c11] 如是我聞：

[0107c11] 一時，佛住波羅[木\*奈]國仙人住處鹿野苑中。

[0107c12] 爾時，世尊告諸比丘：「譬如士夫年壽百歲，有人語言：『士夫若欲聞法，當日日三時受苦，晨朝時受百槍苦，日中、晡時亦復如是。於一日中受三百槍苦。如是日日，至於百歲，然後聞法，得無間等，汝寧能不？』」

[0107c17] 「時，彼士夫為聞法故，悉堪能受。所以者何？人生於世，長夜受苦，有時地獄，有時畜生，有時餓鬼，於三惡道空受眾苦，亦不聞法，是故我今為無間等故，不以終身受三百槍為大苦也。

是故，比丘！於四聖諦未得無間等者，當勤方便，起增上欲，學無間等。」

[0107c23] 佛說此經已，諸比丘聞佛所說，歡喜奉行。

(四〇二) #障

[0107c25] 如是我聞：

[0107c25] 一時，佛住波羅[木\*奈]國仙人住處鹿野苑中。

[0107c26] 爾時，世尊告諸比丘：「於四聖諦平等正覺，名為如來、應、等正覺。何等為四？所謂苦聖諦、苦集聖諦、苦滅聖諦、苦滅道跡聖諦。於此四聖諦平等正覺，名為如來、應、等正覺。是故，諸比丘！於四聖諦未無間者，當勤方便，起增上欲，學無間等。」

[0108a02] 佛說此經已，諸比丘聞佛所說，歡喜奉行。

(四〇三)

[0108a04] 如是我聞：

[0108a04] 一時，佛在摩竭國人間遊行，於王舍城波羅利弗是中間竹林聚落，國王於中造福德舍。爾時，世尊與諸大眾於中宿止。

[0108a07] 爾時，世尊告諸比丘：「我與汝等於四聖諦無知、無見、無隨順覺、無隨順受者，應當長夜驅馳生死。何等為四？謂苦聖諦、苦集聖諦、苦滅聖諦、苦滅道跡聖諦。我與汝等於四聖諦無知、無見、無隨順覺、無隨順受者，應當長夜驅馳生死。以我及汝於此苦聖諦順知、順入，斷諸有流，盡諸生死，不受後有。

於苦集聖諦、苦滅聖諦、苦滅道跡聖諦順知、順入，斷諸有流，盡諸生死，不受後有。是故，比丘！於四聖諦未無間等者，當勤方便，起增上欲，修無間等。」

[0108a17] 爾時，世尊即說偈言：

「我常與汝等，長夜涉生死，不見聖諦故，大苦日增長。

若見四聖諦，斷有大流海，生死永已除，不復受後生。」  
[0108a23] 佛說此經已，諸比丘聞佛所說，歡喜奉行。

(四〇四)

[0108a24] 如是我聞：

[0108a24] 一時，佛在摩竭國人間遊行，王舍城波羅利弗，是中間竹林聚落，大王於中作福德舍。爾時，世尊與諸大眾於中止宿。

[0108a27] 爾時，世尊告諸比丘：「汝等當行，共至申怨林。」

[0108a28] 爾時，世尊與諸大眾到申怨林，坐樹下。

[0108a29] 爾時，世尊手把樹葉，告諸比丘：「此手中葉為多耶？大林樹葉為多？」

[0108b01] 比丘白佛：「世尊！手中樹葉甚少，彼大林中樹葉無量，百千億萬倍，乃至算數譬類不可為比。」

[0108b03] 「如是，諸比丘！我成等正覺，自所見法，為人定說者，如手中樹葉。所以者何？彼法義饒益、法饒益、梵行饒益、明、慧、正覺、向於涅槃。如大林樹葉，如我成等正覺，自知正法，所不說者，亦復如是。所以者何？彼法非義饒益，非法饒益，非梵行饒益、明、慧、正覺、正向涅槃故。是故，諸比丘！於四聖諦未無間等者，當勤方便，起增上欲，學無間等。」

[0108b11] 佛說此經已，諸比丘聞佛所說，歡喜奉行。

(四〇五)

[0108b13] 如是我聞：

[0108b13] 一時，佛住毘舍離獼猴池側重閣講堂。

[0108b14] 爾時，尊者阿難晨朝著衣持鉢，入毘舍離城乞食。時，有眾多離車童子晨朝從城內出，至精舍門，持弓箭，競射精舍門孔，箭箭皆入門孔。

[0108b17] 尊者阿難見已，以為奇特，彼諸離車童子能作如是難事。入城乞食，還舉衣鉢，洗足已，往詣佛所，稽首佛足，退住一面，白佛言：「世尊！我今晨朝著衣持鉢，入毘舍離城乞食，見有眾多離車童子從城內出，至精舍門，競射門孔，箭箭皆入。我作是念：『此甚奇特！諸離車童子能為難事。』」

[0108b24] 佛告阿難：「於意云何？離車童子競射門孔，箭箭皆入，此為難耶？破一毛為百分，而射一毛分，箭箭悉中，此為難耶？」

[0108b27] 阿難白佛：「破一毛百分，射一分之毛，箭箭悉中，此則為難。」

[0108b28] 佛告阿難：「未若於苦聖諦生如實知，此則甚難。如是，苦集聖諦、苦滅聖諦、苦滅道跡聖諦如實知見，此則甚難。」

[0108c02] 爾時，世尊而說偈言：

「一毛為百分，射一分甚難，觀一一苦陰，非我難亦然。」

[0108c05] 佛說此經已，諸比丘聞佛所說，歡喜奉行。

(四〇六)

[0108c06] 如是我聞：

[0108c06] 一時，佛住獼猴池側重閣講堂。

[0108c07] 爾時，世尊告諸比丘：「譬如大地悉成大海，有一盲龜壽無量劫，百年一出其頭，海中有浮木，止有一孔，漂流海浪，隨風東西。盲龜百年一出其頭，當得遇此孔不？」

[0108c10] 阿難白佛：「不能。世尊！所以者何？此盲龜若至海東，浮木隨風，或至海西，南、北四維圍遶亦爾，不必相得。」

[0108c13] 佛告阿難：「盲龜浮木，雖復差違，或復相得。愚癡凡夫漂流五趣，暫復人身，甚難於彼。所以者何？彼諸眾生不行其義、不行法、不行善、不行真實，展轉殺害，強者陵弱，造無量惡故。是故，比丘！於四聖諦當未無間等者，當勤方便，起增上欲，學無間等。」

[0108c19] 佛說此經已，諸比丘聞佛所說，歡喜奉行。

《雜阿含經卷第十五》〈379~406〉

(四〇七) #障

《雜阿含經卷第十六》〈雜因誦第三品之四〉

[0108c28] 如是我聞：

[0108c28] 一時，佛住王舍城迦蘭陀竹園。時，有眾多比丘集於食堂，思惟世間而思惟。

[0109a01] 爾時，世尊知諸比丘心之所念，往詣食堂，敷座而坐，告諸比丘：

「汝等比丘慎莫思惟世間思惟。所以者何？世間思惟非義饒益，非法饒益，非梵行饒益，非智、非覺，不順涅槃。

汝等當正思惟：『此苦聖諦、此苦集聖諦、此苦滅聖諦、此苦滅道跡聖諦。』所以者何？如此思惟則義饒益、法饒益、梵行饒益，正智、正覺、正向涅槃。

[0109a08] 「過去世時，有一士夫出王舍城，於拘絺羅池側正坐思惟——世間思惟。當思惟時，見四種軍——象軍、馬軍、車軍、步軍，無量無數，皆悉入於一藕孔中。見已，作是念：『我狂失性，世間所無，而今見之。』爾時，去池不遠，更有大眾一處聚集。時，彼士夫詣大眾所語言：『諸人，我今發狂，我今失性，世間所無，而我今見，如上廣說。』時，彼大眾皆謂士夫狂發失性，世間所無，而彼見之。」

[0109a17] 佛告比丘：「然彼士夫非狂失性，所見真實。所以者何？爾時，去拘絺羅池不遠，有諸天阿修羅興四種軍，戰於空中。時，諸天得勝，阿修羅軍敗，退入彼池一藕孔中。

是故，比丘！汝等慎莫思惟世間。所以者何？世間思惟非義饒益，非法饒益，非梵行饒益，非智、非覺，非正向涅槃，當思惟四聖諦。何等為四？苦聖諦、苦集聖諦、苦滅聖諦、苦滅道跡聖諦。」

[0109a25] 佛說此經已，諸比丘聞佛所說，歡喜奉行。

（四〇八）

[0109a27] 如是我聞：

[0109a27] 一時，佛住王舍城迦蘭陀竹園。

[0109a28] 時，有眾多比丘集於食堂，作如是論，或謂世間有常，或謂世間無常、世間有常無常、世間非有常非無常，世間有邊、世間無邊、世間有邊無邊、世間非有邊非無邊，是命是身、命異身異，如來死後有、如來死後無、如來死後有無、如來死後非有非無。

[0109b04] 爾時，世尊一處坐禪，以天耳聞諸比丘集於食堂論議之聲。聞已，往詣食堂，於大眾前敷座而坐，告諸比丘：「汝等比丘眾多聚集，何所言說？」

[0109b08] 時，諸比丘白佛言：「世尊！我等眾多比丘集此食堂，作如是論，或說有常，或說無常……」如上廣說。

[0109b10] 佛告比丘：「汝等莫作如是論議。所以者何？如此論者，非義饒益，非法饒益，非梵行饒益，非智、非正覺，非正向涅槃。汝等比丘應如是論議：『此苦聖諦、此苦集聖諦、此苦滅聖諦、此苦滅道跡聖諦。』所以者何？如是論議，是義饒益、法饒益、梵行饒益、正智、正覺、正向涅槃。是故，比丘！於四聖諦未無間等，當勤方便，起增上欲，學無間等。」

[0109b18] 佛說此經已，諸比丘聞佛所說，歡喜奉行。

(四〇九)

[0109b19] 如是我聞：

[0109b19] 一時，佛住王舍城迦蘭陀竹園。爾時，有眾多比丘集於食堂，或有貪覺覺者，或瞋覺覺者，或害覺覺者。

[0109b21] 爾時，世尊知諸比丘心之所念，往詣食堂，敷坐具於眾前坐，告諸比丘：「汝等莫起貪覺覺，莫起恚覺覺，莫起害覺覺。所以者何？此諸覺非義饒益，非法饒益，非梵行饒益，非智、非正覺，不向涅槃。汝等當起苦聖諦覺、苦集聖諦覺、苦滅聖諦覺、苦滅道跡聖諦覺。所以者何？此四聖諦覺，義饒益、法饒益、梵行饒益、正智、正覺、向於涅槃。是故，諸比丘！於四聖諦當勤方便，起增上欲，正智正念，精進修學。」

[0109c02] 佛說此經已，諸比丘聞佛所說，歡喜奉行。

(四一〇)

[0109c04] 如是我聞：

[0109c04] 一時……如上廣說。差別者，起親里覺、國土人民覺、不死覺，乃至聞佛所說，歡喜奉行。

(四一一)

[0109c07] 如是我聞：

[0109c07] 一時，佛住王舍城迦蘭陀竹園。時，有眾多比丘集於食堂，作如是論：「或論王事、賊事、鬪戰事、錢財事、衣被事、飲食事、男女事、世間言語事、事業事、諸海中事。」

[0109c10] 爾時，世尊於禪定中，以天耳聞諸比丘論說之聲，即從座起，往詣食堂，敷坐具於眾前坐，告諸比丘：「汝等比丘眾多聚集，為何所說？」

[0109c14] 諸比丘白佛言：「世尊！我等於此聚集，或論說王事……」如上廣說。

[0109c15] 佛告比丘：「汝等莫作是論，論說王事，乃至不向涅槃。若論說者，應當論說：『此苦聖諦、苦集聖諦、苦滅聖諦、苦滅道跡聖諦。』所以者何？此四聖諦以義饒益、法饒益、梵行饒益、正智、正覺、正向涅槃。」

[0109c20] 佛說此經已，諸比丘聞佛所說，歡喜奉行。

(四一二)

[0109c22] 如是我聞：

[0109c22] 一時，佛住王舍城迦蘭陀竹園。

[0109c23] 時，有眾多比丘集於食堂，作如是說：「我知法、律，汝等不知我所說成就，我等所說與理合；汝等所說不成就，不與理合，應前說者，則在後說；應後說者，則在前說，而共諍論言。我論是汝等不如，能答者當答。」

[0109c28] 爾時，世尊於禪定中，以天耳聞諸比丘諍論之聲……如是廣說，乃至「於四聖諦無間等者，當勤起方便，起增上欲，學無間等。」

[0110a01] 佛說是經已，諸比丘聞佛所說，歡喜奉行。

(四一三)

[0110a03] 如是我聞：

[0110a03] 一時，佛住王舍城迦蘭陀竹園。時，有眾多比丘集於食堂，作如是論：「波斯匿王、頻婆娑羅王，何者大力？何者大富？」

[0110a05] 爾時，世尊於禪定中，以天耳聞諸比丘論說之聲，即從座起，往詣食堂，敷坐具於眾前坐，問諸比丘：「汝等何所論說？」

[0110a08] 時，諸比丘即以上事具白世尊。

[0110a09] 佛告比丘：「汝等用說諸王大力、大富為？汝等比丘莫作是論。所以者何？此非義饒益，非法饒益，非梵行饒益，非智、非正覺，不向涅槃。汝等當說：『此苦聖諦、苦集聖諦、苦滅聖諦、苦滅道跡聖諦。』所以者何？此四聖諦是義饒益、法饒益、梵行饒益、正智、正覺、正向涅槃。是故，比丘！於四聖諦未無間等者，當勤方便，起增上欲，學無間等。」

[0110a17] 佛說此經已，諸比丘聞佛所說，歡喜奉行。

(四一四)

[0110a19] 如是我聞：

[0110a19] 一時，佛住王舍城迦蘭陀竹園。時，有眾多比丘集於食堂，作如是論：「汝等宿命作何等業？為何工巧？以何自活？」

[0110a21] 爾時，世尊於禪定中，以天耳聞諸比丘論說之聲，即從座起，往詣食堂，敷坐具於眾前坐，問諸比丘：「汝說何等？」

[0110a24] 時，諸比丘以上所說具白世尊。

[0110a25] 佛告比丘：「汝等比丘莫作是說：『宿命所作。』所以者何？此非義

饒益，非法饒益，非梵行饒益，非智、非正覺，不向涅槃。

汝等比丘當共論說：『此苦聖諦、苦集聖諦、苦滅聖諦、苦滅道跡聖諦。』所以者何？此義饒益、法饒益、梵行饒益、正智、正覺、正向涅槃。是故，比丘！依於四聖諦未無間等者，當勤方便，起增上欲，學無間等。」

[0110b03] 佛說此經已，諸比丘聞佛所說，歡喜奉行。

# 於上慢《雜阿含經卷第十五》(四〇五)

[0108b13] 如是我聞：

[0108b13] 一時，佛住毘舍離彌猴池側重閣講堂。

[0108b14] 爾時，尊者阿難晨朝著衣持鉢，入毘舍離城乞食。時，有眾多離車童子晨朝從城內出，至精舍門，持弓箭，競射精舍門孔，箭箭皆入門孔。

[0108b17] 尊者阿難見已，以為奇特，彼諸離車童子能作如是難事。入城乞食，還舉衣鉢，洗足已，往詣佛所，稽首佛足，退住一面，白佛言：「世尊！我今晨朝著衣持鉢，入毘舍離城乞食，見有眾多離車童子從城內出，至精舍門，競射門孔，箭箭皆入。我作是念：『此甚奇特！諸離車童子能為難事。』」

[0108b24] 佛告阿難：「於意云何？離車童子競射門孔，箭箭皆入，此為難耶？破一毛為百分，而射一毛分，箭箭悉中，此為難耶？」

[0108b27] 阿難白佛：「破一毛百分，射一分之毛，箭箭悉中，此則為難。」

[0108b28] 佛告阿難：「未若於苦聖諦生如實知，此則甚難。如是，苦集聖諦、苦滅聖諦、苦滅道跡聖諦如實知見，此則甚難。」

[0108c02] 爾時，世尊而說偈言：

「一毛為百分， 射一分甚難， 觀一一苦陰， 非我難亦然。」

[0108c05] 佛說此經已，諸比丘聞佛所說，歡喜奉行。

# 於待時《雜阿含經卷第十五》(四〇六)

[0108c06] 如是我聞：

[0108c06] 一時，佛住彌猴池側重閣講堂。

[0108c07] 爾時，世尊告諸比丘：「譬如大地悉成大海，有一盲龜壽無量劫，百年一出其頭，海中有浮木，止有一孔，漂流海浪，隨風東西。盲龜百年一出其

頭，當得遇此孔不？」

[0108c10] 阿難白佛：「不能。世尊！所以者何？此盲龜若至海東，浮木隨風，或至海西，南、北四維圍遶亦爾，不必相得。」

[0108c13] 佛告阿難：「盲龜浮木，雖復差違，或復相得。愚癡凡夫漂流五趣，暫復人身，甚難於彼。所以者何？彼諸眾生不行其義、不行法、不行善、不行真實，展轉殺害，強者陵弱，造無量惡故。是故，比丘！於四聖諦當未無間等者，當勤方便，起增上欲，學無間等。」

[0108c19] 佛說此經已，諸比丘聞佛所說，歡喜奉行。

# 於放逸（四一五）《雜阿含經卷第十六》

[0110b05] 如是我聞：

[0110b05] 一時，佛住王舍城迦蘭陀竹園。時，有眾多比丘集於食堂，作如是說論：「某甲檀越作麤疎食，我等食已，無味無力，我等不如捨彼麤食，而行乞食。所以者何？比丘乞食時得好食，又見好色，時聞好聲，多人所識，亦得衣被、臥具、醫藥。」

[0110b10] 爾時，世尊於禪定中，以天耳聞諸比丘論說之聲，即詣食堂……如是廣說，乃至「正向涅槃。」

[0110b13] 佛說此經已，諸比丘聞佛所說，歡喜奉行。

（四一六）# 廣由任持

[0110b15] 如是我聞：

[0110b15] 一時，佛住王舍城迦蘭陀竹園。

[0110b16] 爾時，世尊告諸比丘：「汝等持我所說四聖諦不？」

[0110b17] 時，有異比丘從座起，正衣服，為佛作禮，合掌白佛：「唯然，世尊所說四聖諦，我悉受持。」

[0110b19] 佛告比丘：「汝云何受持四聖諦？」

[0110b20] 比丘白佛言：「世尊說言：『此是苦聖諦，我即受持，此苦集聖諦、此苦滅聖諦、此苦滅道跡聖諦。』如是世尊說四聖諦，我即受持。」

[0110b22] 佛告比丘：「善哉！善哉！我說苦聖諦，汝真實受持；我說苦集聖諦、苦滅聖諦、苦滅道跡聖諦，汝真實受持。」

[0110b25] 佛說此經已，諸比丘聞佛所說，歡喜奉行。

(四一七)

[0110b27] 如是我聞：

[0110b27] 一時，佛住王舍城迦蘭陀竹園。

[0110b28] 爾時，世尊告諸比丘：「汝等持我所說四聖諦不？」

[0110b29] 時，有比丘從座起，整衣服，偏袒右肩，為佛作禮，合掌白佛：「唯然，世尊所說四聖諦，我悉受持。」

[0110c02] 佛告比丘：「汝云何持我所說四聖諦？」

[0110c03] 比丘白佛言：「世尊說苦聖諦，我悉受持。如如、不離如、不異如，真、實、審諦、不顛倒，是聖所諦，是名苦聖諦。

世尊說苦集聖諦、苦滅聖諦、苦滅道跡聖諦，如如、不離如、不異如，真、實、審諦、不顛倒，是聖所諦，是為世尊說四聖諦，我悉受持。」

[0110c08] 佛告比丘：「善哉！善哉！汝真實持我所說四聖諦，如如、不離如、不異如，真、實、審諦、不顛倒，是名比丘真實持我四聖諦。」

[0110c11] 佛說此經已，諸比丘聞佛所說，歡喜奉行。

(四一八)

[0110c13] 如是我聞：

[0110c13] 一時，佛住王舍城迦蘭陀竹園。

[0110c14] 爾時，世尊告諸比丘：「汝持我所說四聖諦不？」

[0110c15] 時，有異比丘從座起，整衣服，為佛作禮，合掌白佛言：「唯然，世尊所說四聖諦，我悉持之。云何四諦？世尊說苦聖諦，我悉持之，苦集聖諦、苦滅聖諦、苦滅道跡聖諦，我悉持之。」

[0110c19] 佛告彼比丘：「善哉！善哉！如我所說四聖諦，汝悉持之。諸比丘！若沙門、婆羅門作如是說，如沙門瞿曇所說苦聖諦，我當捨，更立苦聖諦者，但有言數，問已不知，增其疑惑，以非其境界故。

苦集聖諦、苦滅聖諦、苦滅道跡聖諦，我今當捨，更立餘四聖諦者，彼但有言數，問已不知，增其疑惑，以非其境界故。

是故，比丘！於四聖諦未無間等者，當勤方便，起增上欲，學無間等。」

[0110c28] 佛說此經已，諸比丘聞佛所說，歡喜奉行。

(四一九)

[0111a01] 如是我聞：

[0111a01] 一時，佛住王舍城迦蘭陀竹園。

[0111a02] 爾時，世尊告諸比丘：「若比丘於佛有疑者，則於苦聖諦有疑，苦集聖諦、苦滅聖諦、苦滅道跡聖諦則有疑惑；若於法、僧有疑者，則於苦聖諦疑惑，苦集聖諦、苦滅聖諦、苦滅道跡聖諦疑惑；若於佛不疑惑者，則於苦聖諦不疑惑，苦集聖諦、苦滅聖諦、苦滅道跡聖諦不疑惑；若於法、僧不疑惑者，則於苦聖諦不疑惑，苦集聖諦、苦滅聖諦、苦滅道跡聖諦不疑惑。」

[0111a10] 佛說此經已，諸比丘聞佛所說，歡喜奉行。

(四二〇)

[0111a12] 如是我聞：

[0111a12] 一時，佛住王舍城迦蘭陀竹園。

[0111a13] 爾時，世尊告諸比丘：「若沙門、婆羅門於苦聖諦有疑者，則於佛有疑，於法、僧有疑；若苦、集、滅、道疑者，則於佛有疑，於法、僧有疑。若於苦聖諦無疑者，則於佛無疑，於法、僧無疑；於集、滅、道聖諦無疑者、則於佛無疑、於法、僧無疑。」

[0111a18] 佛說此經已，諸比丘聞佛所說，歡喜奉行。

(四二一) # 過

[0111a20] 如是我聞：

[0111a20] 一時，佛住王舍城迦蘭陀竹園。

[0111a21] 爾時，世尊告諸比丘：「汝等共行至深嶮巖。」

[0111a22] 諸比丘白佛：「唯然。世尊！」

[0111a22] 爾時，世尊與諸大眾至深嶮巖，敷座而坐，周匝觀察深嶮巖已，告諸比丘：「此巖極大深嶮。」

[0111a24] 時，有異比丘從座起，整衣服，為佛作禮，合掌白佛言：「世尊！此極深嶮，然復有一極深嶮極嶮於此，甚可怖畏者不？」

[0111a27] 佛知其意，即告言：「如是，比丘！此極深嶮，然復有大深嶮嶮於此者，甚可怖畏，謂諸沙門、婆羅門於苦聖諦不如實知，苦集聖諦、苦滅聖諦、苦滅道跡聖諦不如實知，彼於生本諸行樂著，於老、病、死、憂、悲、惱、苦生本諸行樂著，而作是行；老、病、死、憂、悲、惱、苦行，轉增長故，墮於生深嶮之處；墮於老、病、死、憂、悲、惱、苦深嶮之處。」

如是，比丘！此則大深嶮嶮於此者。是故，比丘！於四聖諦未無間等者，當勤方便，起增上欲，學無間等。」

[0111b08] 佛說此經已，諸比丘聞佛所說，歡喜奉行。

（四二二）

[0111b10] 如是我聞：

[0111b10] 一時，佛住王舍城迦蘭陀竹園。

[0111b11] 爾時，世尊告諸比丘：「有大熱地獄，若眾生於彼中，一向與炯然。」

[0111b12] 時，有異比丘從座起，整衣服，為佛作禮，合掌白佛言：「如世尊說，此則大熱。世尊！唯此大熱，復有大熱過於此者，甚可怖畏，無有過上。」

[0111b15] 「如是，比丘！此則大熱，亦更有大熱過於此者，甚可怖畏，無有過上。何等為更有大熱，甚可怖畏，過於此者？謂沙門、婆羅門此苦聖諦不如實知，苦集聖諦、苦滅聖諦、苦滅道跡聖諦不如實知。

如是乃至生、老、病、死、憂、悲、惱、苦，大熱熾然，是名比丘大熱燒然，甚可怖畏，無有過者。是故，比丘！於四聖諦未無間等者，當勤方便，起增上欲，學無間等。」

[0111b23] 佛說此經已，諸比丘聞佛所說，歡喜奉行。

（四二三）

[0111b25] 如是我聞：

[0111b25] 一時，佛住王舍城迦蘭陀竹園。

[0111b26] 爾時，世尊告諸比丘：「有大闇地獄，彼諸眾生，生彼中者，不見自身分。」

[0111b27] 時，有異比丘從座起，整衣服，為佛作禮，合掌白佛言：「世尊！此則大闇，唯此大闇，復更有餘大闇，甚可怖畏，過於此不？」

[0111c01] 佛告比丘：「如是，更有大闇，甚可怖畏，過於此者，謂沙門、婆羅門於四聖諦不如實知，乃至墮於生、老、病、死、憂、悲、惱、苦大闇之中。是故，比丘！於四聖諦未無間等者，當勤方便，起增上欲，學無間等。」

[0111c06] 佛說此經已，諸比丘聞佛所說，歡喜奉行。

(四二四)

[0111c08] 如是我聞：

[0111c08] 一時，佛住王舍城迦蘭陀竹園。

[0111c09] 爾時，世尊告諸比丘：「如日遊行，照諸世界，乃至千日千月，照千世界、千須彌山、千弗婆提、千閻浮提、千拘耶尼、千鬱單越、千四天王、千三十三天、千炎魔天、千兜率天、千化樂天、千他化自在天、千梵天，是名小千世界。此千世界，中間閻冥，日月光照，有大德力，而彼不見，其有眾生，生彼中者，不見自身分。」

[0111c16] 時，有異比丘從座起，整衣服，為佛作禮，合掌白佛言：「世尊！如世尊說，是大閻冥，復更有餘大閻冥處過於此耶？」

[0111c18] 佛告比丘：「有大閻冥過於此者，謂沙門、婆羅門於苦聖諦不如實知，乃至墮於生、老、病、死、憂、悲、惱、苦大閻冥中，是名比丘有大閻冥過於世界中間閻冥。是故，比丘！於四聖諦未無間等者，當勤方便，起增上欲，學無間等。」

[0111c24] 佛說此經已，時諸比丘聞佛所說，歡喜奉行。

(四二五)

[0111c26] 如是我聞：

[0111c26] 一時，佛住王舍城迦蘭陀竹園。

[0111c27] 爾時，世尊告諸比丘：「從小千世界數滿至千，是名中千世界。於是中千世界，中間閻冥，如前所說，乃至於四聖諦未無間等者，當勤方便，起增上欲，學無間等。」

[0112a01] 佛說此經已，諸比丘聞佛所說，歡喜奉行。

(四二六)

[0112a03] 如是我聞：

[0112a03] 一時，佛住王舍城迦蘭陀竹園。

[0112a04] 爾時，世尊告諸比丘：「從中千世界數滿至千，是名三千大千世界。世界中間閻冥之處，日月遊行，普照世界，而彼不見，乃至墮於生、老、病、死、憂、悲、惱、苦大閻冥中。是故，諸比丘！於四聖諦未無間等者，當勤方便，起增上欲，學無間等。」

[0112a09] 佛說此經已，諸比丘聞佛所說，歡喜奉行。

(四二七) # 顯應知

[0112a11] 如是我聞：

[0112a11] 一時，佛住王舍城迦蘭陀竹園。

[0112a12] 爾時，世尊告諸比丘：「我今當說四聖諦。諦聽！諦聽！善思念之。何等為四？謂苦聖諦、苦集聖諦、苦滅聖諦、苦滅道跡聖諦，是名四聖諦。」

[0112a15] 佛說此經已，諸比丘聞佛所說，歡喜奉行。

[0112a17] 如當說，如是有、如是當知，亦如上說。

(四二八)

[0112a18] 如是我聞：

[0112a18] 一時，佛住王舍城迦蘭陀竹園。

[0112a19] 爾時，世尊告諸比丘：「當勤禪思，正方便起，內寂其心。所以者何？比丘禪思，內寂其心成就已，如實顯現。

云何如實顯現？謂此苦聖諦如實顯現，此苦集聖諦、苦滅聖諦、苦滅道跡聖諦如實顯現。」

[0112a23] 佛說此經已，諸比丘聞佛所說，歡喜奉行。

(四二九)

[0112a25] 如是我聞：

[0112a25] 一時，佛住王舍城迦蘭陀竹園。

[0112a26] 爾時，世尊告諸比丘：「當修無量三摩提，專心正念。所以者何？修無量三摩提，專心正念已。如是如實顯現。云何如實顯現？謂此苦聖諦如實顯現，苦集聖諦、苦滅聖諦、苦滅道跡聖諦如實顯現。」

[0112b01] 佛說此經已，諸比丘聞佛所說，歡喜奉行。

(四三〇) # 黑異熟等

[0112b03] 如是我聞：

[0112b03] 一時，佛住王舍城迦蘭陀竹園。

[0112b04] 爾時，佛告諸比丘：「如人擲杖於虛空中，尋即還墮，或根著地，或腹著地，或頭著地。如是，沙門、婆羅門於此苦聖諦不如實知，苦集聖諦、苦滅聖諦、苦滅道跡聖諦不如實知，當知是沙門、婆羅門或墮地獄，或墮畜生，

或墮餓鬼。是故，比丘！於四聖諦未無間等者，當勤方便，學無間等。」

[0112b10] 佛說此經已，諸比丘聞佛所說，歡喜奉行。

(四三一)

[0112b12] 如是我聞：

[0112b12] 一時，佛住王舍城迦蘭陀竹園。

[0112b13] 爾時，世尊告諸比丘：「如人擲杖置虛空中，其必還墮，或墮淨地，或墮不淨地。如是，沙門、婆羅門於苦聖諦不如實知，於苦集聖諦、苦滅聖諦、苦滅道跡聖諦不如實知；以不如實知故，或生善趣，或生惡趣。是故，諸比丘！於四聖諦未無間等者，當勤方便，起增上欲，學無間等。」

[0112b19] 佛說此經已，諸比丘聞佛所說，歡喜奉行。

(四三二)

[0112b21] 如是我聞：

[0112b21] 一時，佛住王舍城迦蘭陀竹園。

[0112b22] 爾時，佛告諸比丘：「譬如五節相續輪，大力士夫令速旋轉。如是，沙門、婆羅門於此苦聖諦不如實知，此苦集聖諦、苦滅聖諦、苦滅道跡聖諦不如實知，輪迴五趣，而速旋轉，或墮地獄，或墮畜生，或墮餓鬼，或人、或天，還墮惡道，長夜輪轉。是故，比丘！於四聖諦未無間等者，當勤方便，起增上欲，學無間等。」

[0112b29] 佛說此經已，諸比丘聞佛所說，歡喜奉行。

(四三三)

[0112c02] 如是我聞：

[0112c02] 一時，佛住王舍城迦蘭陀竹園。

[0112c03] 爾時，世尊告諸比丘：「如來、應、等正覺增上說法，謂四聖諦，開示、施設、建立、分別、散說、顯現、表露。

何等為四？謂苦聖諦、苦集聖諦、苦滅聖諦、苦滅道跡聖諦。是故，比丘！於四聖諦未無間等者，當勤方便，起增上欲，學無間等。」

[0112c08] 佛說此經已，諸比丘聞佛所說，歡喜奉行。

(四三四)

[0112c10] 如是我聞：

[0112c10] 一時，佛住王舍城迦蘭陀竹園。

[0112c11] 爾時，世尊告諸比丘：「何等為點慧？為此苦聖諦如實知，此苦集聖諦、苦滅聖諦、苦滅道跡聖諦如實知、為不知耶？」

[0112c13] 諸比丘白佛：「如我解世尊所說，於四聖諦如實知者，此為點慧。」

[0112c15] 佛告比丘：「善哉！善哉！於苦聖諦、苦集聖諦、苦滅聖諦、苦滅道跡聖諦如實知者，是則點慧。是故，諸比丘！於四聖諦未無間等者，當勤方便，起增上欲，學無間等。」

[0112c19] 佛說是經已，諸比丘聞佛所說，歡喜奉行。

（四三五）# 大義

[0112c21] 如是我聞：

[0112c21] 一時，佛住舍衛國祇樹給孤獨園。

[0112c22] 時，須達長者往詣佛所，稽首佛足，於一面坐。白佛言：「世尊！此四聖諦為漸次無間等？為一頓無間等？」

[0112c24] 佛告長者：「此四聖諦漸次無間，非頓無間等。」

[0112c25] 佛告長者：「若有說言於苦聖諦未無間等，而於彼苦集聖諦、苦滅聖諦、苦滅道跡聖諦無間等者，此說不應。所以者何？若於苦聖諦未無間等，而欲於苦集聖諦、苦滅聖諦、苦滅道跡聖諦無間等者，無有是處。」

[0113a01] 「猶如有人，兩細樹葉連合為器，盛水持行，無有是處。如是於苦聖諦未無間等，而欲於苦集聖諦、苦滅聖諦、苦滅道跡聖諦無間等者，無有是處。」

[0113a05] 「譬如有人，取蓮華葉連合為器，盛水遊行，斯有是處。如是，長者！於苦聖諦無間等已，而欲於苦集聖諦、苦滅聖諦、苦滅道跡聖諦無間等者，斯有是處。是故，長者！於四聖諦未無間等者，當勤方便，起增上欲，學無間等。」

[0113a10] 佛說此經已，諸比丘聞佛所說，歡喜奉行。

（四三六）# 如四階陞

[0113a12] 如須達長者所問，有異比丘問，亦如是說，唯譬有差別：「如有四登階道，昇於殿堂，若有說言不登初階，而登第二、第三、第四階昇堂殿者，無有是處。所以者何？要由初階，然後次登第二、第三、第四階得昇殿堂。如

是，比丘！於苦聖諦未無間等，而欲於苦集聖諦、苦滅聖諦、苦滅道跡聖諦無間等者，無有是處。

[0113a19] 「譬如，比丘！若有人言：『以四階道昇於殿堂，要由初階，然後次登第二、第三、第四階得昇殿堂，應作是說。』所以者何？

要由初階，然後次登第二、第三、第四階昇於殿堂，有是處故。

如是，比丘！若言於苦聖諦無間等已，然後次第於苦集聖諦、苦滅聖諦、苦滅道跡聖諦無間等者，應作是說。所以者何？若於苦聖諦無間等已，然後次第於苦集聖諦、苦滅聖諦、苦滅道跡聖諦無間等者，有是處故。」

[0113a29] 佛說此經已，諸比丘聞佛所說，歡喜奉行。

（四三七）

[0113b02] 如異比丘問，阿難所問，亦如是說，唯譬差別。

[0113b03] 佛告阿難：「譬如四階梯昇於殿堂。若有說言不由初階，而登第二、第三、第四階昇殿堂者，無有是處。

如是，阿難！若於苦聖諦未無間等，而欲苦集聖諦、苦滅聖諦、苦滅道跡聖諦無間等者，此不應說。所以者何？若於苦聖諦未無間等，而於苦集聖諦、苦滅聖諦、苦滅道跡聖諦無間等者，無有是處。

[0113b10] 「譬如，阿難！由四階梯昇於殿堂。若有人言要由初階，然後次登第二、第三、第四階昇殿堂者，此所應說。所以者何？要由初階，然後次登第二、第三、第四階昇殿堂者，有是處故。

如是，阿難！於苦聖諦無間等已，然後次第苦集聖諦、苦滅聖諦、苦滅道跡聖諦無間等者，斯有是處。」

[0113b17] 佛說是經已，諸比丘聞佛所說，歡喜奉行。

（四三八）# 辨現觀

[0113b19] 如是我聞：

[0113b19] 一時，佛住舍衛國祇樹給孤獨園。

[0113b20] 爾時，世尊告諸比丘：「譬如大地草木，悉取為鏹，貫大海中，一切水虫悉能貫不？」

[0113b22] 比丘白佛：「不能。世尊！所以者何？大海諸虫，種種形類，或於細不可貫，或極大不可貫。」

[0113b24] 佛告比丘：「如是，如是。眾生界無數無量。是故，比丘！於四聖諦未無間等者，當勤方便，起增上欲，學無間等。」

[0113b26] 佛說是經已，諸比丘聞佛所說，歡喜奉行。

（四三九）

[0113b28] 如是我聞：

[0113b28] 一時，佛住王舍城迦蘭陀竹園。

[0113b29] 爾時，世尊手執土石，問諸比丘：「於意云何？此手中土石為多？彼大雪山土石為多？」

[0113c02] 比丘白佛言：「世尊手中土石甚少少耳，雪山土石甚多無量，百千巨億，算數譬類不可為比。」

[0113c04] 佛告比丘：「其諸眾生於苦聖諦如實知者，苦集聖諦、苦滅聖諦、苦滅道跡聖諦如實知者，如我手中所執土石；其諸眾生於苦聖諦不如實知，於苦集聖諦、苦滅聖諦、苦滅道跡聖諦不如實知者，如彼雪山土石，其數無量。是故，比丘！於四聖諦未無間等者，當勤方便，起增上欲，學無間等。」

[0113c11] 佛說是經已，諸比丘聞佛所說，歡喜奉行。

（四四〇）

[0113c13] 如是我聞：

[0113c13] 一時，佛住王舍城迦蘭陀竹園。

[0113c14] 爾時，世尊告諸比丘：「譬如湖池，深廣五十由旬，其水盈滿。若有士夫以髮以毛，或以指端滌彼湖水，乃至再三。云何？比丘！如彼士夫所滌水多？湖池水多？」

[0113c17] 比丘白佛：「如彼士夫毛髮指端再三滌水，甚少少耳，彼湖大水，其量無數，乃至算數譬類不可為比。」

[0113c20] 佛告比丘：「如大湖水，甚多無量。如是多聞聖弟子具足見諦，得聖道果，斷諸苦本，如截多羅樹頭，於未來世成不生法，餘不盡者，如彼士夫髮毛指端所滌之水。是故，比丘！於四聖諦未無間等者，當勤方便，起增上欲，學無間等。」

[0113c25] 佛說是經已，諸比丘聞佛所說，歡喜奉行。

[0113c27] 如大湖水譬，如是薩羅多吒迦、恒伽、耶符那、薩羅遊、伊羅跋提摩

醯，及四大海，其譬亦如上說。

（四四一）

[0114a01] 如是我聞：

[0114a01] 一時，佛住舍衛國祇樹給孤獨園。

[0114a02] 爾時，世尊手捉團土，大如梨果，告諸比丘：「云何？比丘！我手中此團土為多？大雪山中土石為多？」

[0114a04] 諸比丘白佛言：「世尊手中團土少少耳，彼雪山王，其土石甚多，百千億那由他，乃至算數譬類不得為比。」

[0114a06] 佛告諸比丘：「如我所捉團土。如是，眾生於苦聖諦如實知，於苦集聖諦、苦滅聖諦、苦滅道跡聖諦如實知者，亦復如是。如大雪山王土石者。如是，眾生於苦聖諦不如實知，於苦集聖諦、苦滅聖諦、苦滅道跡聖諦不如實知者，亦復如是。是故，比丘！於四聖諦未無間等者，當勤方便，起增上欲，學無間等。」

[0114a14] 佛說是經已，諸比丘聞佛所說，歡喜奉行。

[0114a16] 如雪山王，如是尼民陀羅山、毘那多迦山、馬耳山、善見山、佉提羅迦山、伊沙陀羅山、由撻陀羅山、須彌山王，及大地土石，亦復如是。

[0114a19] 如梨果，如是阿摩勒迦果、跋陀羅果、迦羅迦果、豆果，乃至蒜子譬，亦復如是。

（四四二）# 難得

[0114a21] 如是我聞：

[0114a21] 一時，佛住舍衛國祇樹給孤獨園。

[0114a22] 爾時，世尊以爪甲擎土已，告諸比丘：「於意云何？我爪甲上土為多？此大地土多？」

[0114a24] 諸比丘白佛言：「世尊甲上土甚少少耳，此大地土甚多無量，乃至算數譬類不可為比。」

[0114a26] 佛告比丘：「如甲上土者，若諸眾生，形可見者，亦復如是。其形微細，不可見者，如大地土。是故，比丘！於四聖諦未無間等者，當勤方便，學無間等。」

[0114a29] 佛說是經已，諸比丘聞佛所說，歡喜奉行。

- [0114b02] 如陸地，如是水性亦爾。
- [0114b03] 如甲上土，如是眾生、人道者，亦復如是。
- [0114b04] 如大地土，如是非人亦爾。
- [0114b05] 如甲上土，如是生中國者亦爾。
- [0114b06] 如大地土，如是生邊地者亦爾。
- [0114b07] 如甲上土，如是成就聖慧眼者，亦復如是。
- [0114b08] 如大地土，如是不成就聖慧眼者亦爾。
- [0114b09] 如甲上土，如是眾生知此法、律者，亦復如是。
- [0114b10] 如大地土，如是眾生不知法、律者亦爾。如知，如是等知、普知，正想、正覺、正解、法無間等亦如是。
- [0114b13] 如甲上土，如是眾生知有父母亦爾。
- [0114b14] 如大地土，如是眾生不知有父母亦爾。
- [0114b15] 如甲上土，如是知有沙門、婆羅門家之尊長，作所應作作福，此世他世畏罪行施，受齋持戒亦爾。
- [0114b18] 如大地土，不知有沙門、婆羅門家之尊長，作所應作作福，此世他世畏罪行施，受齋持戒，亦如是說。
- [0114b21] 如甲上土，如是眾生不殺、不盜、不邪淫、不妄語、不兩舌、不惡口、不綺語亦爾。
- [0114b23] 如大地土，如是眾生不持諸戒者亦爾。如是離貪、恚、邪見，及不離貪、恚、邪見，亦如是說。
- [0114b26] 如甲上土，如是不殺、不盜、不邪淫、不妄語、不飲酒。
- [0114b27] 如大地土，如是不持五戒者亦爾。
- [0114b28] 如甲上土，如是眾生持八戒者亦如是。
- [0114b29] 如大地土，如是眾生不持八戒者亦爾。
- [0114c01] 如甲上土，如是眾生持十善者亦如是。
- [0114c02] 如大地土，如是眾生不持十善者亦如是。
- [0114c04] 如甲上土，如是眾生從地獄命終生人中者亦如是。
- [0114c06] 如大地土，如是眾生從地獄命終還生地獄者亦如是。如地獄，如是畜生、餓鬼亦爾。

[0114c08] 如甲上土，如是眾生從地獄命終生天上者亦如是。

[0114c10] 如大地土，如是眾生從地獄命終還生地獄者亦如是。如地獄，如是畜生、餓鬼亦爾。

[0114c12] 如甲上土，如是眾生人道中沒還生人道中者亦如是。

[0114c14] 如大地土，其諸眾生從人道中沒生地獄中者亦如是。如地獄，如是畜生、餓鬼亦爾。

[0114c16] 如甲上土，其諸眾生從天命終還生天上者亦如是。

[0114c18] 如大地土，其諸眾生天上沒生地獄中者亦如是。如地獄，畜生、餓鬼亦如是。

（四四三）# 正見等法

[0114c20] 如是我聞：

[0114c20] 一時，佛住舍衛國祇樹給孤獨園。

[0114c21] 爾時，世尊告諸比丘：「我本未聞法時，得正思惟此苦聖諦，正見已生；此苦集聖諦、此苦滅聖諦、苦滅道跡聖諦，正見已生。」

[0114c23] 佛說此經已，諸比丘聞佛所說，歡喜奉行。

[0114c25] 如已生，如是今生、當生。

[0114c26] 如生，如是起、習、近修、多修、觸、作證亦如是。